



საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

აკვანი

აკვანი (მეგრ. არკვანი, სვან. აკავანი), ჩვილის სანოლი, ძველთაგან გავრცელებული ევროპა-აზიის ზოგიერთ ხალხში.

ა. არის სარწვევი და საქანებელი. სარწვევს საგოგავები აქვს, საქანებელი კი თოკებზეა ჩამოკიდებული. ა-ის პრიმიტი. სახეობაა ე. წ. ხოჭიჭი –საგებლიანი ფიცარი. ნამდვილ ა-ში ჩანვენამდე ჩვილს ხოჭიჭში აკრავდნენ, ზოგჯერ კი ბანდურის (პურეულის) ღეროებში ახვევდნენ და არტახებით ძნასავით კრავდნენ. ამგვარ სანოლს ფირცხი ერქვა. საქართველოში გავრცელებული ჩვეულებრივი სარწვევი ა-ის მოწყობილობაში შედის ნაალი, საბანი, საბეჭურები, არტახები და სხვ. ლეიბში სათანადო ადგილზე ამოჭრილ ჰიგიენურ ნახვრეტში უყრიან შიბაქს ან აფენენ ბუერის, ანწლის, ღოლოს სუფთა ფოთლებს. ავი თვალისაგან ბავშვის დასაცავად, ხალხური ჩვეულების მიხედვით, ა-ზე კიდებდნენ ავგარობებს. უშვილობის ან ბავშვის ავადმყოფობის დროს ხატს პატარა ა-ს სწირავდნენ. საქართველოში ამჟამად გავრცელებული ა. არ უნდა იყოს ქართული. შუა ფეოდალური ხანის ზოგიერთი ტაძრის ფრესკებზე გამოსახული ა-ები ოთხ ფეხზე მდგარი სანოლებია, ხოლო საგოგავების პრინციპზე შექმნილი ა-ები მომთაბარე ტომებს უნდა გაევრცელებინათ. მათ დღესაც ხმარობენ მთელ აღმ. სამყაროში და ცნობილი არიან აღმ. ტიპის ა-ის – ბეშიკის სახელწოდებით. როგორც ჩანს, მოგვიანო ხანაში ქართული ა. ამ უკანასკნელმა შეცვალა. სპეციალისტების აზრით, ა-ში ახალშობილის აღზრდა სერიოზულ დარღვევებს იწვევს ორგანიზმში.

ლიტ.: ბ ა რ დ ა ვ ე ლ ი ძ ე-ლ ო მ ი ა ვ., ბავშვის დაბადებასთან დაკავშირებული რიტუალი მთიან ქართლში, «საქართველოს მუზეუმის მოამბე», 1928, ტ. 4; მ ა ქ ა ვ ა რ ი ა ნ ი ე., ბავშვის მოვლა-აღზრდის წესები მთიულეთში, იქვე, 1957, ტ. 19A და 21B.

გ. ჩიტაია

თ. აბდუშელიშვილი
